

Luvrar cun l'ava – ager scu l'ava

Sonda passada ò l'uniun purtadra dalla veia d'ava «ansaina» festivo igl sies giubileum da 20 onns. La FMR ò discurria cugl president partent e cugl sies successour davart igl presto e davart igl futur.

MATIA DEMARMELS/FMR

Dus decennis activitad per sustignir igl svilup dalla Val Alvra e per inscendar las bellezzas dalla nateira. Igl pi grond project dall'uniun è nia realisò igl onn 2006: Ena veia dasper l'ava da var 7,5 kilometers. Chella vign mantigneida ed adegna puspe inscendada dall'uniun tgi dombra oz 157 commembras e commembers. Indigens e giasts, tots èn bagnnias. Tots èn avidos da participar e da dar impuls pigl svilup dalla regiun.

Ager scu l'ava

«Igl barat tranter indigens e giasts è egna dallas grondas fermezzas dall'uniun», manegia Werner Schiesser, igl nov president d'ansaina anvers la FMR. El sez è nign indigen. Pir avant 5 onns ò el cumpro ena tgesa an la regiun. Anfignen gl'onn passo ò el mano en'interpresa da fiduziari e revisiun cun passa 1300 ampluias. Oz participescha'l a differents cunsegl d'administraziun, passainta pero bler digl sies taimp liber an Val Alvra. Sch'ins discorra cun el, ins survign l'impressiun tgi el canoscha la regiun gio siva da blers onns. El para da s'identifitgier cun la Val Alvra e less s'angascher. «Mintgign duess saveir purtar aint las ideas e s'angascher pigl svilup dalla regiun tenor atgnas fermezzas.» Impurtant seia dad acceptar las debattas, tgi vigna tadlo l'egn sen l'oter e tg'ins tscherna ena schliaziun tgi constetta per tots. «L'ava è en bung motiv per descreiver igl process



Igl president partent Thomas Kollegger (san.) ed igl sies successour Werner Schiesser (dre.) durant igl de da giubileum. FOTO MATIA DEMARMELS

necessari: ella unescha ed ella equilibrescha», declera Werner Schiesser anavant.

Tranter rock'n'roll e musica populara

«Ena dumonda tgi vagn da rasponder adegna puspe è: Lagnsa far rock'n'roll u duess igl svilup esser modest e calm - pitost sumigliant alla musica populara»,

cumpareglia Werner Schiesser la tschertga dalla veia optimala.

Talas discussiuns ò Thomas Kollegger, igl president partent, savens mano durant igl sies angaschamaint alla testa dall'uniun. El teira en facit positiv: «Ja sung surtot losch sen las commembras ed igls commembers.» La gliout seia pronta

da paer ena contribuziun annuala. Persiva survignigl en'invitaziun per neir a luvrar – per mantignir mintg'onn la veia durant dus deis da lavour. Quasi paer per luvrar. «Chegl s'anlei betg da sazez e mossa, tgi l'uniun è sanga ed angascheda», manegia igl om dad Alvagni tgi è siva digl onn 2008 manader digl uffez

digls cumegn digl Grischun. Dasperas la veia d'ava ò l'uniun tranter oter stgaffia en label per commercialisar products indigens ed er mess an strada ena purscheida per far vacanzas a moda e maniera simpla. Adegna an meira: La promozion ed igl svilup dalla regiun.

Cooperaziuns funcziunan

Pertge chel grond angaschamaint da persungas privatas? Stat tal an connex cun ena tscherta malcontantientscha cun las organisaziuns tgi existan? Vign fatg mengia pac per promover igl svilup dalla Val Alvra? «Na, chegl è betg la nosa mutivaziun», manegia Thomas Kollegger. «Nous vagn scumanzo gio igl 2001, lò davigl per exaimpel betg anc igl Parc Ela. Ozande preschantessans mattagn las nossas ideas agl Parc Ela, avant tgi fundar en'uniun.» La dumonda, schi dovra anc l'uniun seia er neida debattada, siva dall'introducziun digl Parc. «Nous ischan nias alla conclusiun tgi lessans cumpletar las offertas cun noss ager.» Las cooperaziuns, gist cugl Parc Ela ni er cun la Veiadafier retica, vegian funcziuno bagn siva dall'antschatta, loda igl president partent.

E tge ins dastga spitgier pigls proxims 20 onns? «Per me ègl impurtant tgi vignans dad adampleir igl noss pensum principal: Mantignir la veia d'ava.» Chegl seia igl minimum. «Sch'ans gartegia dad adegna puspe inscendar ella e da metter accents, alloura sunga digl totfatg satisfatg.»



Igl collegas da parteida Martin Candinas (san.), cunseglieir naziunal e Reto Cramer (dretg), deuto agl Cunsagl grond, èn leds tgi gl'è puspe pussebel dad organisar occurenzas scu l'Agrischa.



L'exposiziun e las attraziuns èn neidas biageidas se per lung dalla loipa da cursa lunga.

FOTOS MATIA DEMARMELS

Desillusiun pigls organisatours dall'Agrischa

La fegn d'emda passada ò gia li l'Agrischa a Lantsch. Igl è stada la sagonda da chest onn. La festa ò tratg pi paca gliout tgi spitgia. La FMR ò visito l'occurenza e tschartgea igls muteivs per la mancanza da giasts.

MATIA DEMARMELS/FMR

Sonda bung 300 giasts, dumengia tranter 600 e 700. Chegl dat en total dad angal 1000 persungas tgi on catto la veia a l'Agrischa tgi ò gia li ainten l'arena da biatlon.

Dantant tot tgi fiss sto paragea: En service da shuttle, specialitads localas ed attraziuns variontas per gioven e vigl. Er ena gruppa da tibas è stada preschainta e schizont l'ora è per en'eda sa mussada dalla sia miglra vart. Ansasez angal igls giasts tgi on mantgea tar l'occurenza tgi carmalescha regularmaitng anturn 10 000 persungas.

Adatto igl concept

Tantas persungas scu oters onns pero nign tgi veva spitgia. Gio igl aton passo ins era sa decida dad adattar igl concept

allas circumstanzas da corona. An pè dad organisar ena singula occurenza gronda, èn neidas planisadas quatter Agrischas pi pitschnas. Igl motto da chest onn: Agrischa on tour. Siva da chegl tgi l'amprema ediziun dalla turnea è neida unfrenda da corona chesta premaveira, ò l'agricultura finalmaitng pudia sa preschentar sen l'alp Curtginatsch (Muntogna da Schons). La festa agl li idilic sen passa 2000 m s.m. ò adampila las aspectativas digls organisatours.

La sagonda runda ò gia li la fegn d'emda passada sot igl motto «an vischnanca». L'arena da biatlon a Lantsch ò purschia ena culissa ideala cun tot l'infrastructura necessaria. «Nous erans ed ischans persuadias digl li», dei Marco Parpan, igl president digl comite d'organisaziun anvers la FMR. Cugl datum ed igl li tscharnia ins vegia sparo da saveir carmalar er en

turist u l'oter. Planiso ins vegia cun bung 3000 visitadras e visitaders durant l'antiera fegn d'emda.

Igl certificat e l'ora

Tgi angal ena terza dallas persungas spitgeidas on catto la veia a Lantsch è ena desillusiun. Treis factours on tenor igl caporganisatour caschuno pigl resultat nunplaschevel: «Tgi vagn laschea antrar angal persungas cun en certificat da Covid-19 è perfranc igl muteiv principal per la mancanza da giasts», manegia Marco Parpan. Pinavant seian betg nias tants tourists scu previa. «L'ora è forsada stada mengia bela e la gliout è sa decideida dad eir ad or u dasperas l'ava.» Ed er igl terz muteiv stetta an connex cun l'ora: «Cunchegl tgi las cundiziuns èn chest onn savens betg stad idealas per culeir, varon varsaquants pous nizigia la bel'ora per far fagn.»

Puraglia angascheda

Igl chint final seia betg anc sen meisa, pero seigl tgunsch pussebel tgi l'agrischa screiva chest onn cefras cotschnas. «La fegnoseira resta da screiver ena nolla sur tot las treis occurenzas da chest onn. Graztga agl sustign digls noss partenaris fidevels, saia an mintga cass gio ossa excluder tgi vign a dar en debachel finanziel.» Surtot mal stetta el per las numerosas gidantras ed igls numerous gidantras. «Ja less angratzter da tot cor pigl grond angaschamaint agls radond 130 voluntaris.»

Galdia tuttegn

L'atmosfera tigl preschaints è stada bunga malgro la paca gliout. Uscheia ins vegia duple peda per discorrer e beber egn ansemen, ò managea ena gruppa da gidantras anvers la FMR. Ed er agls repre-

sentants dalla politica ògl plaschia. Igl cunseglieir naziunal Martin Candinas per exaimpel, è sto led da puspe saveir esser tranter la gliout. Chegl vegia mantgea durant la pandemia. «Ja visit adegna gugent las Agrischas ansemen cugls mies unfants. Els gioldan e profiteschon dallas purscheidas fitg creativas», ò el managea, avant tgi suandar igls sies giuvnots tigl post da far pantg. Er igl sies collega da parteida, igl deuto digl Cunsagl grond Reto Cramer, ò galdia l'occurenza: «Cunchegl tg'ia va en ferm connex cun l'agricultura, giolda fitg las discussiuns cugls pous preschaints. L'Agrischa è er adegna ena bunga pussebladad per s'accorscher, noua tgi igl calzer strocla tot tenor.»

La proxima e davosa Agrischa da chest onn ò li igls 17 d'otgover a Castaneda.